

# **Pita**

#### Na Titiono Eigna Na Letasi Iaani

A Pita sina mane vaovarongo nigna a Jisas. Leghugna a Jisas ke vula hadi i popo, a Pita na mane vetula mi sikei itadia mara kena baubatu tadia na komi tinoni kiloau i Jerusalem. Reghia Buka Tango 15:7-11.

A Pita ke risoa na letasi iaani vanira na komi tinoni kena vaututuni kena mono tadia kekeha provins kena vunaghi pungusira mara Rom. Tadia na komi provins irangeni, mara kena boi vaututunia a Jisas, imarea kena bosi magnahaghinira na komi tinoni kiloau mena vaparara.

A Pita ke risoa na letasi iaani bali vaheta na ghaghanadia na komi tinoni kiloau eigna kedana sokara ngasi kori vido kena papara kori havidia. Na vunegna imarea kena adoa a Krais ke papara kori havigna, e toke gi imarea kedana sasaa na papara mua eigna kena vaututunia. A Pita ke velera na komi papara ke padara bali pipilia nidia na vaututuni. Gi kedana sokara ngasi mena jufu kori vagovugna, a God keda hera na komi fata ke toke ke kaikaliti vanira nigna na komi tinoni.

Kori letasi iaani a Pita ke velera mua na komi tinoni kiloau eigna kedana leghu hahalia na komi puhi ke jino ke nabadia na komi tinoni nigna a Jisas Krais.

#### Na Komi Fata Ke Nagho Kori Letasi Iaani:

Na komi fata a God ke kaikalitia vanira nigna na komi tinoni (1:1-12)

Na komi tinoni kena vaututuni kedana mono tabu (1:13--2:10)

Na komi puhi na komi tinoni kiloau kedana leghura (2:11--4:19)

Na velepuhi eidia arahai kena baubatu tadia na komi tinoni kiloau (5:1-14)

1 Inau a Pita, nigna na mane vetula a Jisas Krais, ku risoa atu itamiu ighamu a God ke vahighamu koti mono ivei mi vei tadia na komi provins i Pontus, Galesia, Kapadosia, Esia mi Bitinia. Na komi meleha irangeni boi na pukuni melehamiu. 2 Leghuagna nigna na toatogha ke mono itagna i hau, a God a Mama ke vahighamu eigna kotida nigna na komi tinoni. Ma na Tarunga ke Tabu ke agutu kori havimiu eigna kotida mono tabu. A God ke vahighamu eigna kotida leghua a Jisas Krais, ma na ghaughabuagna imanea ke vararahaghamu kori koakoa. Inau ku tarai gi a God keda vatokeghamu me

heghamu hahali na soleana kori havimiu.

## Ighita Katida Pitua Na Komi Fata Ke Kaikalitia Vanighita A God

<sup>3</sup> Ati veletokea nigna na God ma a Tamagna nida a Lod, Jisas Krais. Na vunegna nigna na rarovi vanighita ke hutu puala, imanea ke heghita na havi mathangani. Mi ikageeni ighita kati adoa a God keda eia vanighita na komi fata ke toke. A God ke heghita na havi mathangani iaani eigna a Jisas Krais ke havi tabiru kori thehe. <sup>4</sup> Ikageeni ighita kati pitua na komi fata ke toke a God ke kaikaliti vanira nigna na komi tinoni. Imanea ke kalitira na komi fata iraani i popo, tagna keda boi

boto ba dika, keana keda talu mono thovohaliu. 5 Na vunegna ighamu koti vaututunia a God, imanea keda sokara peoghamu kori nigna na mana me ghieghilei jufu mai na vagougovui maghavu. Kori vido iangeni imanea keda vahavighamu. 6 Ighamu koti totogo hutu puala eigna na komi fata irangeni. Toke kotida dikahehe sina ghathi vido iso eigna na komi thagi papara ke padaghamu ikageeni, ighamu koti totogo eigna na komi fata ke toke a God ke eia vanighamu. <sup>7</sup> Na komi papara iraani kena padaghamu bali tateli aua nimiu na vaututuni ke pukuni tutuni ba teo. Nimiu na vaututuni ke vaghagna na gol kena pughulia kori joto bali hati aua na komi fata ke dika itagna. TMa nimiu na vaututuni ke nagho vano tagna na gol ke boi mono thovohaliu. Gi keda talu heta nimiu na vaututuni leghugna ke govu na komi papara, a God keda veletokeghamu me ghaghana boheghamu tagna na maghavu a Jisas Krais keda tabiru mai. 8 Ighamu koti boi reghia a Jisas i hau moti boi reghia ikageeni. Keana ighamu koti dothovia moti vaututunia imanea. Ma na vunegna koti vaututunia, ighamu koti totogo hutu puala moti hahi nimiu na veleagna sa fata ke nabagna na totogo iangeni. 9 Na tabamiu eigna koti vaututunia a Jisas Krais, na vahavighamugna a God ke eia. 10-11 I hau, mara na profet kena kidi titionoa ghohi a God keda vatokeghamu kori nigna na dotho me vahavighamu. Na Tarunga ke Tabu nigna a Krais ke mono ikoradia mara na profet, me tatelia vanira a Krais keda kidi papara, gi a God keda abe hadia. Imarea kena hiohiroa puala tadia na komi Rioriso ke Tabu eigna kena magnahaghinia kedana adoa na maghavu ma na puhi keda tate mai na komi fata iraani. 12 Na Tarunga ke Tabu ke tatelia vanira na komi profet na komi titiono kena eia eigna a Krais, boi bali hathera ghehedia, keana bali hatheghamu. Mi ikageeni ighamu koti rongovia ghohi na komi titiono iraani tadia arahai kena titiono vanighamu na Rorongo ke Toke. Imarea kena titionoa kori nigna na mana na Tarunga ke Tabu a God ke vetula horu maia i popo. Na vunegna na komi fata a God ke eia bali vahavighita ke toke puala, na komi enjel huju kena magnahaghinia puala mua kedana thaothadoghagna.

# God Ke Magnahaghinighita Katida Mono Tabu

13 Na vunegna a God ke eia vanighamu na komi fata ke toke irangeni, oti mono kaikaliti kori ghaghanamiu eigna kotida agutu vania. Moti reireghighamu ghehemiu tagna na koakoa. Oti vaututuni hahalia a God keda heghamu na komi fata ke toke kori vido a Jisas Krais keda tabiru mai. 14 Na vunegna ighamu ara dathegna a God moti leghua, oti saghoi eia na komi puhi ke dika koti magnahaghinia na eiagna kori vido koti boi adoa mua a God. 15 Keana ikageeni, na havimiu keda pukuni tabu, eigna a God ke vahighamu ke tabu. 16 A God ke velea tadia na komi Rioriso ke Tabu, "Oti mono tabu eigna inau ku tabu."

<sup>1:7 =</sup> Imarea kena kukia na gol kori joto, mi kori vido na gol ke bea na komi garu itagna kena tatave mena hati aua eigna na pukuni gol vamua keda mono. Vaghagna iangeni, na komi papara ke padaghita ke hatheghita na auagna na komi fata ke dika kori havida eigna keda pukuni heta nida na vaututuni.
1:16 = Levitikas 11:44-45, 19:2, 20:7

3 Pita 2:3

<sup>17</sup> A God, koti kiloagna a Tamamiu kori vido koti tarai, imanea ke boi thevu tagna ahai kori vido ke fatera na komi tinoni eigna na komi fata kena eia. Na vunegna iangeni, oti ghaghana bohea a God kori vido koti mono tadia na komi meleha ke boi na pukuni melehamiu. 18 Oti ghaghana bohea a God eigna ighamu koti adoa imanea ke volighamu au eigna kotida mamaluha tagna na komi puhi ke boi tangomana na hatheghamugna. Ighamu koti pipilia tadia ara hutumiu na komi puhi ke dika irangeni. A God ke boi volighamu au tagna sa fata keda govu vaghagna na silva ba na gol. Teo. 19 Imanea ke volighamu au tagna na fata ke nagho vano, na pukuni ghaughabuagna a Krais. A Krais ke vaghagna sina dathei sip kena havughaghia ke teo sa fata ke dika itagna. 20 Gi e vavuha na maramagna a God, imanea ke kidi vahia ghohi a Krais eigna keda vamamaluhaghamu kori koakoa. A God ke boi vetula maia a Krais i hau, keana tadia na komi dani iraani gi e govu na maramagna, a God ke vetula maia imanea eimiu ghamu. 21 Ighamu koti vaututunia a God eigna na hava ke eia a Krais. Ma na vunegna a God ke vahavi tabirua imanea kori thehe me vathaba, ighamu koti vaututunia a God moti vaututunia imanea keda heghamu na komi fata ke toke ke taluhaghorea vanighamu.

<sup>22</sup> Ighamu koti vararaha na havimiu kori vido koti vaututunia na velepuhi ke tutuni eigna a Jisas Krais, ma na vunegna iangeni ighamu koti turughu na dothoviragna ara kulamiu kiloau. Mi inau ku magnahaghinighamu kotida veidothovighi hahali kori hetamiu doudolu. <sup>23</sup> Oti veidothovighi eigna a God ke heghamu na havi mathangani. Na havimiu ke mathangani iangeni e boi mai tadia ara idomiu mara tamamiu kedana thehe, keana tagna na haghoregna a God. Ma na haghoregna a God keda mono thovohaliu, me mono nigna na mana bali vamathangania na havimiu. <sup>24</sup> Na komi Rioriso ke Tabu kena velea,

"Na komi tinoni kena vaghagna na buburu,

ma na dodorodia ke toke ke vaghagna na komi falaoa.

Na buburu ke gho'e ma na komi falaoa kena sikili horu,

<sup>25</sup> kari na haghoregna a Lod ke mono thovohaliu."

Ma na haghore iangeni, na Rorongo ke Toke kena titionoa ghohi itamiu.

#### A Krais Na Naghoi Ghahira

 ∧ Na vunegna a God ke heghamu
 🚄 na havi mathangani, oti saghoi leghua na toatogha bali vadiadikalara arahai tavogha. Saghoi piapilau ba eia vaghagna ighamu koti jino eigna kedana veletokeghamu vamua na komi tinoni. Moti saghoi tahotha ba vuha haghore eigna sa tinoni. <sup>2</sup> Oti vaghagna na komi meomeo kena eu havi kena rofo mena haga susuu ghadia. Oti rofo eigna na haghoregna a God eigna nimiu na vaututuni keda heta, ma a God keda vahavighamu. 3 Oti eia vaghagna iaani eigna koti reghia ghohi kori havimiu a Lod ke eia na komi fata ke toke vanighamu.

<sup>4</sup> Oti mai tagna a Lod Jisas Krais ke heghita na havi mathangani. Imanea ke vaghagna na naghoi ghahira kori hidigna na vathe. <sup>†</sup> Na ghahira iangeni, na komi tinoni kena bosi magnahaghinia, kari a God ke vahia me toatogha ke nagho vano. 5 Ighamu koti hatia na havi mathangani, koti vaghagna na komi ghahira a God ke hatia bali agutua nigna na vathe. Na vathe iangeni hiri, ighamu koti leghua a God. Na Tarunga ke Tabu ke agutua na vathe iangeni itamiu. Ighamu koti hatia na havi mathangani, a God ke eighamu eigna kotida nigna na booi pris bali agutu vania. Ma na vunegna na hava ke eia a Jisas Krais, imanea keda totogo eidia na komi fata koti eia vania. 6 Iaani ke vaghagna na hava a God ke velea ke mono tadia na komi Rioriso ke Tabu,

"I Jerusalem, inau ku tutua sina ghahira kori hidigna na vathe. Inau ku vahia na ghahira iangeni eigna keda na naghoi ghahira. Ahai ke vaututunia, imanea teo keda toatogha ke boi toke ke vaututunia."

<sup>7</sup> Tamiu ighamu koti vaututunia, a God ke ghaghana boheghamu. Keana na fata ke dika keda padara arahai kena boi vaututunia, eigna "Na ghahira kena boi

magnahaghinia mara kena agutu vathe,

ikageeni na ghahira iaani na naghoi ghahira kori hidigna na vathe." 8 Na komi Rioriso ke Tabu kena velea mua, "Iaani na ghahira ke vapejuraghinira na komi tinoni ke sethe eigna kedana sikili."

Imarea kena sikili eigna kena boi leghua na haghoregna a God. Na sikili kena eia ke leghua nigna na vanohehe a God eidia.

<sup>9</sup> Keana ighamu na booi tinoni ke vahighamu a God. Ighamu na komi pris bali agutu vania a God na King. Ighamu na komi tinoni ke tabu nigna imanea ghehegna. Ma a God ke vahighamu eigna kotida titiono aua itadia na komi tinoni na komi fata ke toke ke eia. Imanea ke kiloghamu au kori puni me hatighamu kori nigna na raraha ke toke puala. <sup>10</sup> I hau, ighamu boi na komi tinoni nigna a God, kari ikageeni ighamu na nigna imanea. I hau a God ke boi rarovighamu, kari ikageeni imanea ke rarovighamu.

# Na Puhi Ke Nabadia Na Komi Tinoni Agutu Nigna A God

11 Ara kulagu kiloau ku dothovighamu, na vunegna ighamu koti mono tadia na komi meleha kena boi pukuni melehamiu, inau ku haghore heta vanighamu eigna kotida saghoi leghua nimiu na komi vanohehe ke dika ke rihu pungusighamu. 12 Ighamu koti mono duadia na komi tinoni bongihehe, mi kekeha maghavu imarea kena toroghamu mena velea ighamu koti eia na komi puhi ke dika. Oti leghu hahalia na puhi ke jino eigna kedana reghia na komi fata ke toke koti eia. Gi kotida eia iangeni, imarea kedana veletokea a God kori maghavu imanea keda mai itadia.

<sup>2:4 =</sup> Na naghoi ghahira kori hidigna na vathe: Reghia kori Diksonari.

**<sup>2:6</sup>** = Aesaea 28:16

<sup>2:7 =</sup> Psalm 118:22

<sup>2:8 =</sup> Aesaea 8:14

5

13 A Lod ke magnahaghinighamu kotida leghua na haghoredia arahai kena vunaghi pungusighamu kori maramagna, haluhadi na King gna i Rom, † eigna imanea ke vunaghi pungusira na komi tinoni gougovu. 14 Moti leghua mua na haghoredia na komi primia eigna na king ke vahira bali vaparara arahai kena eia na komi fata ke dika mena kilothabara arahai kena leghua na puhi ke jino. 15 God ke magnahaghinighamu kotida eia na komi fata ke toke eigna na komi tinoni kena hahi kedana soto na haghore diadikalaghamugna. 16 Na vunegna ighamu koti vaututunia a Krais, ighamu koti mamaluha tagna na papara ke nabamiu eigna na komi paluhamiu. Kari oti saghoi toatogha gi e toke vamua kotida eia na komi fata ke dika eigna ighamu koti mamaluha. Keana oti leghua na puhi ke nabagna na komi tinoni agutu nigna a God. 17 Oti ghaghana bohera na komi tinoni gougovu moti dothovira ara kulamiu kiloau. Ghaghana bohea a God moti ghaghana bohea mua na King gna i Rom.

# Leghua Na Puhigna A Krais Kori Papara

<sup>18</sup> Ighamu na komi tinoni seka, <sup>†</sup> oti leghua na haghoredia na komi vunaghimiu moti ghaghana bohera hahali. Kekeha vunaghimiu ke toke mena eia vanighamu na komi puhi ke toke. Keana kekeha kena eia na hava ke dika itamiu. Oti leghura gougovu vamua. <sup>19</sup> Kekeha maghavu na komi vunaghimiu, toke kotida boi eia sa fata ke dika, imarea kena vaparaghamu. Gi kotida ghathapaku eigna koti togha hahalia a God kori

vido kena vaparaghamu, a God keda totogo eimiu. <sup>20</sup> Keana, gi kotida ghathapaku kori vido kena thabuhighamu eigna na fata ke dika koti eia, a God keda boi totogo eimiu. A God keda totogo vamua gi kotida ghathapaku kori vido kena vaparaghamu eigna na fata ke toke koti eia. 21 A God ke kiloghamu eigna kotida papara vaghagna iangeni eigna a Krais ke papara eimiu ighamu me tateli vanighamu na puhi kotida leghua. 22 A Krais ke boi eia sa koakoa me teo sa piapilau ke au mai kori livogna. 23 Kori vido imarea kena titiono diadikala a Jisas, imanea ke boi haghore tughura tagna sa haghore ke dika. Kori vido imarea kena vapara, imanea ke boi velea keda raghe leghura. Teo. A Jisas ke vaututunia a God keda reireghia, eigna a God ke fatera na komi tinoni kori puhi ke jino hahali. <sup>24</sup> Kori vido a Krais ke thehe kori ghaibabala, imanea ke hatia na komi paluhada kori tonogna eigna ighita katida taveti sania na koakoa mati mono hahali kori puhi ke jino. Na komi ngeso kori tonogna ke vajinoghamu kori matagna a God. 25 I hau, ighamu koti vaghagna na komi sip ke jefe kori hangana, kari ikageeni ighamu koti tabiru mai tagna ahai ke reireghighamu me kalitighamu.

# Na Velepuhi Eidia Na Komi Tinoni Taulaghi

3 Ighamu na koi vaivine koti taulaghi, oti leghua na haghoredia ara taumiu. Gi kekeha ara taumiu kedana boi vaututunia na haghoregna a God, imarea kenughua da ena magnahaghinia na

vaututuniagna kori vido kena reghia na puhimiu ke toke. E toke vamua kotida boi titiono itadia eigna a Krais, <sup>2</sup> eigna imarea kedana reghi leghua na puhimiu ke jino mena reghia mua ighamu koti ghaghana bohea a God. <sup>3</sup> Boi na fata ke nagho na eiagna na komi fata bali vatoetokelaghagna na dodoromiu, vaghagna na pijiriagna na sesehumiu, ba na vahagheagna na komi fata bali gniagnilau kena agutua kori gol, ba na pipisiagna na komi pohe ke vahotha. 4 Na fata ke nagho keda vatoetokelaghagna na dodoromiu, na hava keda au mai kori havimiu. Na mono taluleghu ma na mono bughoro, e rua na fata ke ulaghagna thovohaliu ma a God ke toatogha ke nagho vano. 5 I hau na koi vaivine kena maimanihihia a God mena vaututunia imanea keda eia na hava ke taluhaghorea, iira kena vatoetokelaghagna na dodorodia kori puhi iangeni. Iira kena leghua na haghoredia ara taudia. 6 A Sera sikei itadia. Iia ke leghua na haghoregna a Ebraham me kiloa na vunaghigna. Gi kotida eia na komi fata ke jino moti boi mataghu, ighamu ara dathegna a Sera.

<sup>7</sup> Ighamu na komi mane koti taulaghi, na vunegna ara taumiu kena boi heta vaghagna ighamu, oti togha hahalia na hava ke toke kotida eia vanira. Oti ghaghana bohera, eigna iira kedana hatia duamiu na havi ke teo na govugna a God ke hera nigna na komi tinoni. Gi kotida boi eia iaani, a God keda boi rongovia nimiu na tarai.

#### Na Velepuhi Eidia Na Komi Tinoni Kiloau

8 Iaani nigua na vagovui velepuhi itamiu. Inau ku magnahaghinighamu kotida sikei na ghaghanamiu moti veirarovighi. Oti veidothovighi vaghagna koti tamatahi, moti veihatheghi kori hehei dotho moti mono taluleghu. 9 Saghoi eia na dika vanira arahai kena eia na dika itamiu, moti saghoi haghore diadikalara arahai kena haghore diadikalaghamu. Keana oti kaea a God eigna keda vatokera. A God ke magnahaghinighamu kotida eia iangeni, mi imanea ke taluhaghorea keda vatokeghamu gi kotida eia. 10 Vaghagna na komi Rioriso ke Tabu kena velea,

"Gi kotida magnahaghinia na mono totogo kori havimiu,

oti saghoi titionoa na komi haghore ke dika moti saghoi piapilau.

<sup>11</sup> Taveti sania na komi puhi ke dika moti eia na komi puhi ke toke.

Oti agutu heta eigna kotida mono haidu toetoke duadia na komi tinoni.

Oti eia na komi fata iraani eigna a Lod ke reireghi toetokera arahai kena mono jino me rongovia nidia na tarai.

Keana a Lod ke sokara pungusira arahai kena eia na komi fata ke dika."

#### Ighita Katida Sasaa Na Papara Kori Vido Kati Eia Na Hava Ke Toke

13 Gi kotida agutu heta bali eia na komi fata ke toke, da teo ahai keda vaparaghamu. 14 Keana, gi kedana vaparaghamu eigna ighamu koti eia na komi fata ke jino, a God keda vatokeghamu. Oti saghoi mataghunira arahai kena vaparaghamu moti saghoi lubatia na ghaghanamiu keda horuhaihadi. 15

Pita 4:5

7

Keana oti ghaghana bohea a Krais moti lubatia eigna keda vunaghi pungusia na havimiu. Oti mono kaikaliti hahali bali haghore tughura arahai kedana huatighamu na vunegna gi koti vaututunia a Krais. 16 Moti mono taluleghu moti ghaghana bohera kori vido koti haghore tughura. Oti leghu hahalia na puhi koti adoa ke jino. Gi kotida eia iangeni, arahai kena velea na komi fata ke dika eigna na puhimiu ke toke, imarea kedana maomamo nidia. 17 Gi a God keda lubatighamu eigna kotida papara eigna na fata ke toke koti eia, a God keda totogo eimiu. Keana gi kotida papara eigna koti eia na fata ke dika, a God keda boi totogo eimiu.

<sup>18</sup> A Krais huju ke papara kori vido ke thehe eigna na komi paluhada. Imanea ke sikei vamua na theheagna me teo keda ghoi thehe eigna mua na komi paluhada. Imanea ke teo sa paluhagna kari imanea ke thehe eida ighita na komi tinoni koakoa bali hatighita atu tagna a God. Imarea kena vathehea na tonogna a Krais, keana na Tarunga ke Tabu ke vahavi tabirua. 19 Mi kori nigna na mana na Tarunga ke Tabu, a Krais ke vano me titiono tadia na komi tarunga kena mono kori meleha papara. 20 Na komi tarunga iangeni, na komi tarungadia arahai kena huhughua a God kori vido a Noa ke agutua na vaka. Kori vido iangeni a God ke boi saisami na vapararagna eigna ke magnahaghinia kedana tughua na havidia ke dika. E alu vamua na tinoni kena hahaghe kori vaka kena boi bilomo eigna na vaka ke tatave kori bea. <sup>21</sup> Ma na bea iangeni, na totoghalegna na vahavighamugna a God ke eia vanighamu tagna na siuvitabu. Na pukuni siuvitabu, boi

na lumiagna na garu kori tono. Teo. Na pukuni siuvitabu, na kaekae kati eia tagna a God gi keda talutavogha na paluhada me vararaha na havida. Na siuvitabu iaani ke tangomana na vahavighitagna eigna a Jisas Krais ke sokara tabiru kori thehe. <sup>22</sup> A Jisas ke hadi i popo mi ikageeni ke sopou kori madothogna a God. Ingengeni imanea ke vunaghi pungusira na komi enjel ma na komi tidatho ma na komi tarunga gougovu.

#### Na Puhi Ke Nabadia Arahai Kena Vaututuni

<sub>I</sub> Ighamu koti adoa ghohi a Krais 4 ke papara kori vido ke thehe kori ghaibabala. Na vunegna imanea ke sasaa na papara, ighamu ghua kotida sasaa na papara. Eigna ahai ke papara ke bosi magnahaghinia na koakoa keda talu vunaghi pungusia na havigna. 2 Imanea ke taveti sania na koakoa eigna keda boi leghua mua nigna na komi vanohehe ke dika kori vido ke talu havi mua kori maramagna. Keana imanea keda leghua vamua nigna na vanohehe a God. <sup>3</sup> Kori vido koti boi vaututunia mua a Krais, ighamu koti eia na komi puhi ke dika kena eia na komi tinoni bongihehe. Kori vido iangeni, ighamu koti nere duadia arahai kena boi ara taumiu, moti mamagna, moti kou memee, moti eia na komi haidu bali eia na komi puhi ke dika. Sina fata ke dika puala koti eia mua, ighamu koti maimanihihira na komi ngunguju.

<sup>4</sup> Keana ikageeni na komi tinoni bongihehe kena vere nidia itamiu eigna koti boi eia duadia na komi thagi puhi ke dika irangeni, mena haghore diadikalaghamu. <sup>5</sup> Keana oti saghoi vaovarongo itadia eigna ivughei valiha imarea kedana titiono aua tagna a God na komi fata kena eia. Ma a God ke kaikaliti bali fatera arahai kena havi ma arahai kena thehe ghohi. <sup>6</sup> Iangeni na vunegna imarea kena titionoa na Rorongo ke Toke tadia arahai itamiu kena thehe ghohi ikageeni. Toke na tonodia ke thehe eigna na koakoa kena eia, imarea kena rongovia na Rorongo ke Toke eigna na tarungadia kedana tangomana na havi vaghagna a God ke havi.

7 Na maghavu keda govu na maramagna iaani ke gharani mai ghohi. Na vunegna iangeni, oti reireghighamu ghehemiu tagna na koakoa moti mono kaikaliti hahali eigna kotida tangomana na tarai. 8 Na fata ke nagho vano, oti veidothovighi kori hehemiu doudolu. Gi kotida dothovira na komi tinoni, ighamu kotida talutavogha na paluhadia kori vido kena eia na dika itamiu. 9 Oti kalitira ara kulamiu kiloau kori vathemiu. E boi toke kotida bosi nimiu na eiagna iangeni. 10 A God ke heghamu soasopa sonihathavu bali eia na agutu keda hathera arahai tavogha. Moti agutu toetoke kori sonihathavu ke heghamu. 11 Arahai a God ke hera na sonihathavu bali titiono, imarea kedana titionoa na komi haghore ke mai tagna a God. Ma arahai a God ke hera na sonihathavu bali hathera arahai tavogha, imarea kedana eia kori heta ke hera a God. Oti ei toetokea na agutu ke heghamu a God eigna na komi tinoni kedana veletokea a God kori vido kena reghia na komi fata koti eia ke toke eigna koti mono haidu duagna a Jisas Krais. God ke mono nigna na mana ma na ghaghana bohe ke hutu ke hau me hau. Amen.

### Ighita Katida Totogo Kori Vido Katida Papara

<sup>12</sup> Ara kulagu, oti saghoi nia vere tadia na komi papara hutu ke padaghamu, eigna na papara boi na fata mathangani itamiu. Na komi papara irangeni kena mai itamiu bali pipilia nimiu na vaututuni. 13 Oti totogo eigna ighamu koti tangomana na papara vaghagna a Krais ke papara. Oti eia iangeni eigna nimiu na totogo keda hutu vano mua kori vido a Krais keda tabiru mai kori nigna na mana ke hutu. 14 Kori vido na komi tinoni kena haghore diadikalaghamu eigna koti leghua a Krais, oti totogo eigna na haghore diadikalaghamugna kena eia ke tateli aua nigna na Tarunga a God ke pukuni mana puala ke mono duamiu. 15 E boi toke gi kotida hatia na papara eigna koti thabu vathehea na tinoni, ba oti biabilau, ba oti boi leghua kekeha mua na vetula, ba oti diadikala nidia na agutu arahai tavogha. 16 Keana gi kedana vaparaghamu eigna ighamu koti leghua a Krais, oti saghoi maomamo. Oti veletokea vamua a God eigna na komi tinoni kena adoa ighamu koti nigna a Krais.

<sup>17</sup> Na maghavu a God keda fatera na komi tinoni ke jufu mai ghohi, mi imanea keda kidi fatera nigna na komi tinoni. Na vunegna a God keda kidi fateghita ighita kati vaututuni, ighita kati adoa na fate imanea keda eia itadia arahai kena boi vaututunia na Rorongo ke Toke, kenughua e tahu vano tagna na fate keda eia itada. <sup>18</sup> Na komi Rioriso ke Tabu kena velea,

"Gi keda vahotha na vahaviragna na komi tinoni kena jino,

na hava keda padara arahai kena boi leghua a God mena eia na komi puhi ke dika na?" <sup>19</sup> Gi ighamu kotida papara leghuagna nigna na vanohehe a God, saghoi soto na eiagna na komi fata ke toke, moti lubatia na havimiu kori limagna a God, eigna imanea ke vavuhaghamu me ei hahalia na hava ke velea keda eia.

### Na Velepuhi Eidia Mara Kena Baubatu Kori Kiloau

■ Ighamu koti baubatu kori kiloau, **i**nau ku magnahaghinia kuda titiono vanighamu. Inau huju sina mane ku baubatu mu reghia kori matagu na papara ke eia a Krais. Mi inau ku adoa, kori vido a Krais keda tabiru mai, inau kuda mono duamiu koragna nigna na mana ke hutu. 2 Inau ku magnahaghinighamu kotida reireghi toetokera na komi tinoni kiloau a God ke boa kori limamiu. Oti reireghira vaghagna na mane reireghi sip ke reireghi toetokera nigna na komi sip. Oti saghoi reireghira eigna koti toatogha arahai kena vahighamu kena hurughamu vamua. Teo. Oti sasaa na reireghiragna eigna a God ke magnahaghinighamu kotida eia. E boi toke gi kotida baubatu kori kiloau eigna ighamu koti magnahaghinia vamua na rongo. Saghoi eia vaghagna iangeni. Keana oti eia eigna koti pukuni magnahaghinia na hatheragna arahai koti reireghira. 3 Saghoi hurura arahai koti batura vaghagna ighamu koti vunaghidia, keana oti tateli vanira na puhimiu ke nabagna kedana leghua. 4 Mi kori vido a Krais, na vunaghidia mara kena reireghi sip keda tabiru mai, imanea keda heghamu na taba keda boi govu. Ighamu kotida mono hahali

duagna koragna nigna na mana ke hutu.

<sup>5</sup> Ighamu mara mathangani, inau ku magnahaghinighamu kotida leghua na haghoredia mara puhi. Ighamu gougovu koti vaututuni, oti mono taluleghu moti veihatheghi. Eigna na komi Rioriso ke Tabu kena velea, "A God ke sokara pungusira arahai


kena tautalunagho, keana imanea ke vatokera arahai

kena mono taluleghu."
<sup>6</sup> Oti sasaa na mono taluleghu
saragna na mana ke hutu nigna a
God. Gi kotida eia iangeni, imanea
keda vahaihadighamu kori maghavu
ke vahia. <sup>7</sup> Kori vido ke horuhaihadi
na ghaghanamiu eigna sa fata, oti
vaututunia a God keda hatheghamu,
eigna imanea ke toghaghamu me
reireghighamu.

<sup>8</sup> Oti reireghighamu ghehemiu tagna na koakoa moti mono kaikaliti hahali, eigna a Satan nimiu na thevuioka, imanea ke hiro hahalia na tinoni kiloau eigna keda diadikala nigna na vaututuni. Imanea ke vaghagna na laion ke nguru eigna ke magnahaghinia na vanga. <sup>9</sup> Oti sokara pungusia a Satan moti sokara ngasi kori nimiu na vaututuni, eigna ighamu koti adoa na komi thagi papara ke padaghamu ke padara mua ara kulamiu kiloau kena mono ivei mi vei kori maramagna.

<sup>10</sup> Ikageeni ighamu koti papara sina ghathi vido vamua, keana a God ke dothovighita hahali keda hatheghamu. Imanea keda vajinoa na havimiu, me vaheta nimiu na vaututuni, me heghamu na mana eigna kotida sokara ngasi hahali. A God ke kiloghamu eigna kotida totho itagna a Krais koragna nigna na

Pita 5:11 10



Satan Ke Vaghagna Na Laion Ke Nguru

mana ke hutu. <sup>11</sup> A God keda vunaghi pungusira na komi fata gougovu ke hau me hau. Amen.

### Na Vagovui Haghore

<sup>12</sup> A Sailas ke hatheu na risoagna na letasi kudo iaani. Imanea a kulada kori vaututuni mu adoa ke leghua a Krais hahali. Inau ku riso atua na letasi iaani vanighamu bali vaheta nimiu na vaututuni. Mu magnahaghinia kuda veleghamu na komi fata gougovu ku risoa kori letasi iaani ke tateli aua na puhi a God ke dothovighamu. Oti sokara ngasi kori nigna na dotho a God iangeni.

Na komi tinoni kena vaututuni kena mono eeni i Rom, imarea kena vetula atua itamiu nidia na haghore dotho. A God ke vahira vaghagna vamua imanea ke vahighamu. A Mak ke vaghagna a dathegu, imanea huju ke vetula atua mua nigna na haghore dotho. 14 Oti veikubaeghi † kori dotho. Inau ku tarai gi a God keda heghamu ighamu koti mono haidu toetoke duagna a Krais na soleana kori havimiu.